

**Svečana promocija i dodjela diploma diplomantima/diplomanticama i
magistrantima/magistranticama Univerziteta u Sarajevu**

20. decembar 2025. godine

Govor

Prof. dr Tarik Zaimović, rektor Univerziteta u Sarajevu

Dobrodošli na promociju diplomanata i diplomantica, magistrantica i magistranata Univerziteta u Sarajevu za akademsku 2024/2025. godinu.

Danas, Univerzitet u Sarajevu s ponosom promovira 3547 studenata i studentica, a u ovoj generaciji, čak 206 studentica i studenata Univerziteta u Sarajevu su tokom studija ostvarili rezultate kojima su zaslužili posebna priznanja Univerziteta – zlatnu i srebrenu značku, te povelju Univerziteta.

Dopustite mi da na početku, kao rektor Univerziteta, zamolim sve naše diplomantice i diplomante, magistrante i magistrantice da ustanu i pogledaju u svoje najmilije koji su danas ovdje s njima.

Dragi roditelji/rodbino, dragi prijatelji i gosti naših studenata, ova diploma danas nije samo u rukama vaše djece, vaših najmilijih.

U njoj su i Vaše neprospavane noći, vaša odricanja i vaša snaga kada je bilo najteže.

U njoj su Vaše tihe, neiskazane brige – ali i ponos koji danas ne trebate skrivati.

Vi ste bili prva učionica, bezrezervna podrška i prikrivena snaga.

A kada je bilo teško, bili ste oslonac i ona beskrajno važna nemjerljiva utjeha u jednostavnim riječima „bit će to sve uredu...“.

Kada je bilo sumnje Vi ste bili sigurna luka.

Dragi studenti, Vaše neprespavane noći bile su i njihove, a Vaše brige oni su nosili tiho.

I zato danas, zamolio bih sve naše diplomantice i diplomante, magistrante i magistrantice da jednim posebnim, glasnim aplauzom – kako to samo studenti znaju, odamo priznanje svima Vama koji ste imali onu tihu i nemjerljivu zaslugu u postignućima Vaših najbližih.

Današnji uspjeh, ovaj trenutak pripada i Vama.

Dragi studenti i studentice, za sve nas ovo je poseban dan i odvojite danas vrijeme da pogledate oko sebe vaše kolegice i kolege.

Upamtite ovaj trenutak. Vi ste od danas dio akademske zajednice najveće, najstarije i najznačajnije naučno-istraživačke, umjetničke i obrazovne institucije u državi.

Vi ste od danas neraskidivi dio vašeg Univerziteta u Sarajevu.

Mi danas obilježavamo vaša akademska postignuća i put koji ste prošli kako biste stigli do ovog trenutka. Taj put nije bio jednostavan. Bio je to put pun izazova, odricanja, ali i ličnog rasta i razvoja. Ustrajali ste, prevazišli ste različite izazove.

Ipak, dragi diplomanti i diplomantice, magistranti i magistrantice, danas stojite na raskršću gdje se jedna etapa završava, a nova počinje. Svijet u kojem živimo i u kojem ćete Vi graditi svoju budućnosti, suočava se sa izazovima koji ne poznaju granice.

A Vi ste dio generacije koja više ne može čekati – Vi ste oni koji morate graditi jednu drugačiju budućnost. Vi ste dio generacija koja više ne može biti samo posmatrač, već nadasve aktivan akter, pokretač i graditelj.

Zato želim da današnji trenutak posvetimo jednoj riječi koja je istovremeno i teška i plemenita, i jednostavna i zahtjevana – ujedno je tihi vodič i snažan lični poziv – ODGOVORNOST.

Odgovornost ne samo prema diplomi koju dobijate, niti prema porodici koja vas je podržala, niti prema univerzitetu/profesorima koji su vam nesebično dali znanje.

Odgovornost ponajprije prema sebi.

Jer odgovornost ne znači samo lični uspjeh.

U eri zaglušujuće moralne hipokrizije, Bosna i Hercegovina treba lidere koji ne čekaju dopuštenje, već djeluju. A Vi ste diplomirali i magistrirali na univerzitetu koji je preživio opsadu i rat – naslijedili ste duh tog otpora. Koristite ga.

Vi morate biti oni koji neće pristati na oportuna rješenja, koji neće šutjeti pred nepravdom, i koji neće kreirati mir radi komfora.

Ne prihvatajte kompromis koji vas udaljava od istine, i nemojte zaboraviti da je najveći stupanj hrabrosti reći istinu u lice nepravdi.

Budite glasni kada treba, ali i mudri. Budite odlučni, ali i pravedni. Budite generacija koja će reći *dosta!* tamo gdje prethodne nisu znale ili nisu htjele.

Jer domovina se ne gradi velikim sloganima, nego malim, tihim, ali svakodnevnim djelima. Gradi se radom, učenjem i integritetom.

A Bosna i Hercegovina nije samo mjesto rođenja, nije samo pejzaž koji volimo, niti historija koju učimo. Domovina je obaveza, odgovornost – da je branimo, čuvamo, popravljamo i gradimo.

Mnogi od vas će putovati, mnogi će raditi u svijetu, mnogi će graditi karijere daleko od domovine. Ali gdje god bili – neka Bosna i Hercegovina ostane u vašem djelu, u vašoj odluci da doprinesete, da vratite znanje, da investirate u svoju domovinu.

Dragi studenti, u nastavku vašeg profesionalnog puta, zapamtite: “Najveći uspjeh nije u tome da nikada ne padnemo, već da se svaki put podignemo.”

Neka to bude vaša snaga.

Da kada padnete – a hoćete, jer padovi su nužni – ustanete jači, mudriji, odgovorniji.

I nikada nemojte zaboraviti da su neuspjeh i porazi najvažnije iskustvo i nadasve presudna sadržajna komponenta uspjeha.

Danas ovdje ispred Vas su dekanice i dekani vaših fakulteta i akademija, ponosni na još jednu generaciju i puni nade – onog učiteljskog sna, da su među vama oni koji će svojim radom i rezultatima izmijeniti svijet.

Obrađujte ih svojim uspjesima.

Iza dekana su njihove kolegice i kolege, profesori i saradnici, naučni radnici, svi oni koji su svoj život posvetili vašem boljitku i uspjehu. Oni su svoje znanje izdašno prenosili na Vas, a njihova kritika je uvijek bila samo sa ciljem vašeg uspjeha.

Nosite njihov rad i odnos prema vama s ponosom, i uvijek čuvate njihovo dostojanstvo.

Drage diplomantice, diplomanti, magistrantice i magistri, danas vi niste dobili diplomu – diplomu ste stekli, ali ste prihvatili i odgovornost.

Nosite je hrabro. Nosite je dostojanstveno.

Nosite je tako da vaše djelovanje postane najbolji dokaz da su znanje, čestitost i rad još uvijek najjače sile na ovom svijetu.

Univerzitet u Sarajevu će uvijek biti uz vas. To je mjesto gdje ste sticali znanja, razvijali se kao osobe. Nosite ime svog univerziteta s ponosom, poštujuete ga – a kroz život i rad promovirajte vrijednosti znanja i obrazovanja.

Na kraju, poštovane kolegice i kolege, svi smo mi danas ponosni na vas.

A Vi budite ponosni na to da ste diplomantice i diplomanti, magistranti i magistrantice Univerziteta u Sarajevu!

Svi mi od Vas očekujemo da:

Budete poštteni i hrabri - čak i kad je najteže. Vaš integritet nema cijenu.

Da učite cijeli život. Diploma je početak.

Nemojte čekati bolje društvo – budite oni koji ga stvaraju.

Ne pristajte na nepravdu. Jer šutnja je saučesništvo.

Borite se protiv korupcije i nepotizma bez kompromisa – budite svjetionik integriteta.

Vjerujte u sebe, ali i u zajednicu.

Djelujte hrabro i odlučno – domovina se gradi djelo po djelo.

Budite sve što mi nismo umjeli biti.

Budite sve za što mi hrabrosti imali nismo.

Neka vas prati sreća, neka vas vodi znanje, a neka vas čuva savjest.

Čestitam svima – i vjerujemo u vas.

A Univerzitet u Sarajevu je bio i ostaje vaš akademski dom.